

Utaqqiisaasumik inissiani ineqartitaanerup il.il. akileraarusersuiffigineqarnera pillugu paasissutissaq

Inatsisartut 2012-imi ukiakkut ataatsimiinnerminni akuersissutigivaat utaqqiisaasumik inigisassaq sioqqullugu inissiani ineqartitaanerit aammalu utaqqiisaasumik inissiani ineqartitaanerit nalingi uki-oq aningaasarsiorfik 2013 allarnerfigalugu akileraarusersorneqartalissasut. Utaqqiisaasumik inigisassaq sioqqullugu inissiat aammalu utaqqiisaasumik inissiat ima paasineqassapput inissiat, taakkununga ilanngullugit ineeqqat, inissiaaqqat il.il. atorfinitsitaanermut atatillugu ineqartinneqarneq sioqqullugu inissiat atugassanngortinneqarsimasut.

Tamanna isumaqarpoq inissiani ineqartitaanerit nalingi, matumani ilanngullugit utaqqiisaasumik inigisassaq sioqqullugu inissiani aammalu utaqqiisaasumik inissiani tamakkiisumik ilaannakortumilluunniit akeqanngitsumik sulisumit inissiat atugassanngortitaasimasut nalingi aningaasarsiat akileraaruteqaataasussat naatsorsorneranni siunissami ilanngunneqartassapput. Nalingi angissusilerneqassapput, sulisorisanut inissiat tamakkiisumik ilaannakortumilluunniit akeqanngitsumik atugassanngortinneqarsimasunut naatsorssueriaatsit assinginik annertoqataanillu, takukkit akeqanngitsumik tamakkiisumik ilaannakortumilluunniit ineqartitaanermi akileraarusiineq pillugu Akileraartarnermut Aqutsisoqarfiup nalunaarutaa nr. 67, 1. oktober 2012-imeersoq kiisalu akeqanngitsumik ineqartitaanerup nalinga pillugu Akileraartarnermut Aqutsisoqarfiup nalunaarutaa nr. 68, 1. oktober 2012-imeersoq. Nalunaarutit taakku marluk ukiumut aningaasarsiorfimmu 2013-imut atuupput.

2013-imut akeqanngitsumik ineqartitaanerup akileraarusersorneqarnissaanut nalit atuisunut akit nikerarnerat naapertorlugu iluarsineqarput ingerlatsinermilu aningaasartuutitut akiliutissat ilaqutariinnut ataatsinut aamma illunut marloqiusanut m²-imut 404 koruuniulluni ilaqutariinnullu arlariinni inissiani m²-imut 447 koruuniulluni.

Taakkua saniatigut ilanngunneqassaaq aningaasaliissuteqarnermut iluanaarutissaq illup naammassillugu sananeqarnerani nalinganit, pisiarineqarneranut akigititap il.il. 1,5 %-iinik.

Assersuut

Inissiaq ataatsimik initalik 40 m²-inik angitigisoq pequtsersugaq pineqarpoq, naammassillugu sanaartorneqarnerani aningaasartuutit m²-imut 14.000 koruuniupput, nalinga ukiumut akileraarusersorneqartussaq katillugit 27.480 koruuniussapput.

Taakkulu ima naatsorsorneqarlutik:

Ingerlatsinermi aningaasartuutitut: 40 m ² x kr. 447	17.880 kr.
Aningaasaliissuteqarsimasumut iluanaarutisiassaq:	
40 m ² x kr. 14.000 x 1,5 %	8.400 kr.
Pequtsersorikkamut tapiliussaq	<u>1.200 kr.</u>

Katillugit

27.480 kr.

Taakku saniatigut innaallagissamik atuinermut, imeqarnermut kiassarnermullu aningaasartuuterpi-aat ilanngunneqassapput, tamakkua sulisitsisup akilertarsimappagit.

Inissiami ilaqutarinngisanik allanik aamma inisimasoqartillugu akeqanngitsumik ineqartitaanermut maleruagassat atuutinneqassapput. 2013-imi akeqanngitsumik ineqartitaanermi nali ukiumut 15.300 koruunit tunngavigalugit akileraartitsisoqassaaq.

Sulisut ullumikkut utaqqiisaasumik inigisassaq sioqqullugu akeqanngitsumik inissiani ineqartitaareersut imaluunniit akeqanngitsumik inissiani ineqartitaareersut kiisalu 2013-imi sulit taamaattuni ineqartitaanissartik ilimagigunikku siumoortumik nalunaarsuiffigineqarnertik allangortinneqarnissaa siunertaralugu akileraaruseriffimmut qaninnermut saffiginninnissaat isumassarsiatsialaasussaa-voq. Taamaaliornikkummi akileraarutissat sinnerinut akiligassanik annertuunik kingusinnerusukkut akiligassinneqarsinnaaneq pinngitsoortinneqassammat.

Utaqqiisaasumik inissiani akeqanngitsumik ineqartitsinerit aningaasarsiatut B-tut nalunaarutigini-saat sulisitsisup akisussaaffigaa. Ukiumoortumik akissarsiarititat il.il. pillugit paasissutissanik nalunaaruteqarnermut atatillugu nalunaaruteqarneq pissaaq.